

REGLUR

um einfaldari tollskýrslugerð fyrir vörur á farmskrá sem njóta sérstakra tollfríðinda við innflutning.

1. gr.

Reglur þessar taka einungis til eftirtalinna vara sem fluttar eru til landsins á farmskrá og undanþegnar eru öllum opinberum gjöldum við innflutning:

- a) Vörur sem forseti Íslands og maki hans flytja inn til eigin nota eða honum eru sendar að gjöf og fallið geta undir undanþáguheimild 1. tölul. 1. mgr. 3. gr. tollalaga.
- b) Vörur til sendiráða, sendiráðismannsskrifstofa, sendierindreka og sendiráðsmanna erlendra ríkja sem undanþegnar eru gjöldum samkvæmt 2. tölul. 3. gr. tollalaga.
- c) Tilteknar skrifstofuvörur sem sendar eru kjöræðismönnum erlendra ríkja og undanþegnar eru gjöldum samkvæmt 3. tölul. 3. gr. tollalaga.
- d) Venjulegur farangur áhafnar fars sem undanþeginn er gjöldum samkvæmt 4. tölul. 5. gr. tollalaga.
- e) Venjulegur farangur ferðamanna sem orðið hefur viðskila við ferðamann svo og fatnaður og aðrar ferðanaudsynjar manna sem látist hafa erlendis og undanþegið er gjöldum samkvæmt 5. og 6. tölul. 5. gr. tollalaga.
- f) Heimilismunir manna sem flytja búferlum hingað til lands og undanþegnir eru gjöldum samkvæmt 7. tölul. 5. gr. tollalaga.
- g) Heiðursmerki svo og verðlaun fyrir íþróttafrek og önnur afrek sem unnin eru erlendis og undanþegin eru gjöldum samkvæmt 8. tölul. 5. gr. tollalaga.
- h) Brúðargjafir og aðrar gjafir sem undanþegnar eru gjöldum samkvæmt 10. tölul. 6. gr. tollalaga.
- i) Notaðir munir sem hafa fallið í arf erlendis og undanþegnir eru gjöldum samkvæmt 11. tölul. 6. gr. tollalaga.
- j) Farmskrár, farmbréf, vöruhefningar, þökkunarlistar, útskriftir o.þ.h., einnig á tölvu-miðlum, sem sent er framflytjendum, flutningsmiðlurum, bönkum og öðrum til eigin nota endurgjaldslaust og hefur ekkert viðskiptalegt gildi.
- k) Dagskrárgerðarefni sem útvarps- og sjónvarpsstöðvum er sent erlendis frá.

Ríkistollstjóri getur, að höfðu samráði við fjármálaráðuneytið, fellt niður eða aukið við upptalningu samkvæmt 1. mgr. ef hann telur ástæðu til.

2. gr.

Tollmeðferð samkvæmt reglum þessum er háð því að gætt sé að öllu leyti ákvæða í reglugerðum, auglýsingum og öðrum fyrirmælum sem sett hafa verið um framkvæmd þeirra lagaákvæða sem vitnað er til í 1. gr.

Að öðru leyti er tollmeðferð samkvæmt reglum þessu háð því skilyrði að í vörusendingum þessum séu eingöngu vörur sem notið geta tollfrelsis samkvæmt 1. gr.

Vörusendingar sem í eru jafnframt aðrar vörur og greiða ber af toll eða önnur gjöld eða háðar eru innflutningstakmörkunum eða skráningu skulu undantekningarlaust tollafgreiddar með venjulegum hætti og yfir þær gerð aðflutningsskýrsla á eyðublaði E1 eða sérstök póstaðflutningsskýrsla ef við á. Þetta tekur þó ekki til tollfrjálsra búslóða sem um ræðir í f-lið 1. gr. sem í er sjónvarpstæki, fjarskiptatæki, símtæki, skotvopn o.þ.h., enda sé fyrirbyggjandi leyfi viðkomandi stofnunar við tollafgreiðslu.

3. gr.

Viðtakandi vörusendingar sem óskar eftir tollmeðferð samkvæmt reglum þessum skal útbúa aðflutningsskýrslu fyrir vörusendinguna á eyðublaði E8 og veita þær upplýsingar sem eyðublaðið gefur tilefni til.

Vörusendingar sem heimilt er að tollafgreiða samkvæmt þessum reglum má afgreiða beint frá farmflytjanda, enda hafi tollstjóri fasta tollvakt í geymslu framflytjanda og tollgæslumaður þar veiti aðflutningsskýrslunni viðtöku ásamt þeim gögnum sem til staðar þurfa að vera til staðfestingar á upplýsingum sem veittar hafa verið í aðflutningsskýrslunni, t.d. farmbréf, pósthylgibréf, vottorð um búsetuskipti o.s.frv.

Tollgæslumaður getur krafðið innflytjanda um frekari upplýsingar og sönnunargögn ef þurfa þykir vegna tollmeðferðar vörusendingar samkvæmt reglum þessum.

Undirskrift innflytjanda eða umboðsmanns hans undir aðflutningsskýrsluna jafngildir yfirlýsingu hans um að hann ábyrgist að vörusendingin fullnægi öllum skilyrðum sem sett eru í viðkomandi tilviki til þess að notið verði tollfrelsis, sbr. einnig 16. gr. tollalaga.

Við tollafgreiðslu skal tollgæslumaður ganga úr skugga um réttmæti þeirra upplýsinga sem gefnar eru í aðflutningsskýrslu og þeim gögnum öðrum sem lögð eru fram og samþykkja afhendingu vörusendingarinnar með undirskrift sinni.

Frumrit aðflutningsskýrslu ásamt þeim gögnum sem afhent hafa verið við tollafgreiðslu skulu send endurskoðunardeild ríkistollstjóra við skil á öðrum aðflutnings- og útflutnings-skjölum en önnur afrit afhent innflytjanda, þar af eitt ætlað farmflytjanda.

5. gr.

Ríkistollstjóri ákveður gerð eyðublaðs fyrir tollafgreiðslur samkvæmt reglum þessum, upplýsingar sem þar skulu veittar svo og annað sem lýtur að framkvæmd þeirra eftir því sem þurfa þykir.

6. gr.

Reglugerð þessi er sett samkvæmt heimild í 15. og 148. gr. tollalaga nr. 55/1987, með síðari breytingum, til þess að öðlast gildi frá og með 1. nóvember 1987.

Fjármálaráðuneytið, 26. október 1988.

F. h. r.

Lárus Ögmundsson.

Guðrún Ásta Sigurðardóttir.